

**Oqaasiliortut marlungornermi oktobarip ulluisa pingajuanni
2001, nal. 09.00 ataatsimiinnerannit imaqarniliaq**

Peqataasut: Carl Chr. Olsen, Nuka Møller, Alibak Steenholdt, Sofia Geisler, Kelly Berthelsen, allatsigalugu Kristine Olsvig.

Oqaluuserisat:

1. Oqaluuserisassat qulequtaannik akuersineq.
2. Aggustip ulluisa 24-anni ataatsimiinnerup imaqarniliornerata akuerisassanngorlugu saqqummiunnera.
3. Ilisimatitsissutit.
4. *Sinerissamut Aqutsivik.*
5. *Qulliarneq.*
6. *Security-check.*
7. *Maalaneq* imaluunniit *naammagittaanneq.* Jakob Schultzip saaffiginnissutaa.
8. Ilinniarnertuunngorniarfimmum isersinnaanermut piumasagaat.
9. Taasariaqartut allat.

- 1 pillugu -


Oqaluuserisassat arfineq pingajuattut, Ilinniarnertuunngorniarfimmum isersinnaanermum piumasagaammum tunngasoq ilanngunneqareermat, oqaluuserisassat akuerineqarput.

- 2 pillugu -

Imaqarniliaq akuerineqarpoq.

- 3 pillugu -

CCO.: Oqaatsinut politikkeqalernissamum innersuussusiaq sapaatip akunnerata uuma tulliani Naalakkersuisumum tunniunneqassaaq, tamatumalu kingorna Inatsisartunumt agguanneqassalluni.




CCO.: Karl Asser Møllerip Atuagagdliutitut allagarisimasaa Naalakkersuisup isumaanik tusarniaareernerup kingorna CCO-imit akissusiorneqassaaq.

CCO.: Nunat Avannaamioqatigiit oqaatsit pillugit ataatsimeersuarnerannit taamatullu Sprogpolitisk referencegruppemødemit imaqarniliornerit Oqaasiliortunut ilisimatitsissutitut agguanneqassapput.

CCO.: Mittarfeqarfinni oqaatsit atugaanerit pillugit CCO Mittarfeqarfiit sulisoqarnermut pisortaannut paasiniaanermigut paasitinneqarpoq isumannaallisaaneq eqqarsaatigalugu napasulianiit timmisartunut attaveqarnermi pinngitsoorani oqaatsit paaseqatigiissutigineqartussat atorineqarnissaat nalinginnaasoq, allatigulli sulisut kalaallisut oqalussinnaanerat killilersorneqanngitsoq. Taamaakkaluartoq Konstabel Pynt mittarfinnut allanut naleqqiullugu immikkooruteqarluinnarmat immikkut isigisariaqarnera pinerullugu qallunaatut oqaatsit pingaaruteqarluinnarnerat erseqqissaatigineqarpoq.

SG.: Radiukkut saqqummiunneqarnerani ima paasinarpoq, sulisut arlaata naammagittaalliutigigaa kaffisortarfinmiitillutilluunniit kalaallisut oqalutsillutik qallunaamik isertoqarpat pinngitsooratik qallunaatut oqalunnissaminnik piunaffigineqarsimasut. Kingorna Mittarfeqarfiit pisortaqarfiannit naammagittaalliutaasoq pinnagu napasuliamiit qallunaatuinnaq oqaluttarnissaq eqqartorpaat oqallinnerlu kipiinnakkatut killilerneqariasarluni.

CCO.: Oqaasileriffiup nalinginnaasumik ingerlanneqarneranut aningaasatigut 10-15% missiliorlugit sippuinissaq naatsorsuutigineqarpoq. Tamanna aningaasaliissutaasartut ikippallaarneranik pissuteqarpoq. Taamaakkaluartoq ingerlatat allat soorlu oqaatsinut politikkilliornissamut suleqatigiissitamut aningaasaliissutit taamatullu leksikografisk projektimut aningaasaliissutit sinneqartoorfiupput. Naatsorsuutit Per Langgård peqatigalugu aaqqissuunneqassapput, pisariaqassappallu ikililerisoqartariaqassaaq.



NM.: Nunanut allanut allattoqarfik Nunavut-miit saaffigineqarsimavoq, tassani kalaallisut allagaatit assigiinngitsut pigineqartut piumasarineqarsimallutik. Nunavut-mi oqaatsinut tunngasunik suliaqartut kalaallisut allattaaseq aallaavigalugu allattaasissaminnik pilersitsiniarnerminnut atugassaminnik suleqatiserinnillutik kissaateqarput.

CCO.: Saaffiginnissut taanna ilisimavaa, isumaqarlunili Inuit Issittormiut Kattuffiata oqaatsinut tunngasumik ataatsimiititaliaa tusarniaaffigeqqaartariaqartoq. Tamatuma kingorna Nunavut-mi aammalu nunatsinni Oqaasiliortunut qanoq aaqqiisoqarsimaneranik tusarliunneqassaaq.

- 4 pillugu -


CCO.: Sulisussarsiornermik allagartaliussassamut kukkunersiuinermini nalaatsornerinnarmik naammattoorjaa pisaq "Sinerissami Aqutsisut"-tut taaguuserneqarsimasoq.

SG.: Pineqartoq erseqqissarneqartariaqarpoq. *Sinerissami Aqutsivik*-tut taaguuserneqarpat pinngitsoorani apeqquserneqassaaq sumut aqutsiviunersoq. Peqqinnissaqarfiup iluani sorpassuit ingerlanneqartarput soorlu, kigutileriffiit, utoqqarnik meeraaqanillu takusaasartut, juumuut laborantit il.il.

AS.: Oqaaseq *sinerissami* taaguummi ilaasariaqanngilaq.

NM.: Qallunaatut taaguutaa *kystledelsen* aamma erseqqinngilaq.

KB.: Napparsimaveqarfiit paasinnittaaseq malillugu sorpassuarnik imaqartinneqartarpoq, taamaattumik siunnersuut taanna pisamut tulluarnaruvoq.



Oqaasiliortut isumaqatigiillutik aalajangiuppaat pisaq **Napparsimaveqarfinnik Aqutsivik**-tut taaguuteqassasoq.

- 5 pillugu -


CCO.: Uumasut nakorsaanit allakkiaq najoqqutaralugu uumasut kukiffaat nappaammit attorneqarneq ajorput, taamaallaalli kukiffaasa akorni seerilersarput. Seerisoorneq uumasut timaannut nappaatitut ersiutitut tamanut atuummat, siunnersuutigaa *qulliarneq*-mut taarsiullugu nappaat *seerisoorneq*-mik taaguuserneqassasoq.

KB.: Seerinerunngilaq pullattoornerullunili. Nappaatip ersiutigisartagai tunngavigalugit *qulliarneq nuffioorneq*-lluunniit taaguutigitissallugit tulluutinnigillat.

SG.: Seerinermit aallaavilimmik nappaatip taaguuserneqarnissaa ornigineruaa. Aamma seerisoornerup saniatigut ersiutit ilagaat uumasut qarnganit qappiorneq, seerisoornerli annertunerusumik nappaammi ersiutaanerpaavoq. Oqaasiliortut isumaqatigiillutik aalajangerpaat uumasut nappaataat *mund og klovsyge seerisoorneq*-mik taaguuteqassasoq, taannalu aalajangerneq tusagassiutinut Otto Steenholdtimullu allakkatigut nalunaarutigineqassasoq, tassungalu ilanngullugu uumasut nakorsaata allagaata nuutsinneqarnera nassiunneqassalluni.

- 6 pillugu -

CCO.: *Security-check* Nuup Mittarfiani taamatullu Narsarsuup Mittarfiani nalinginnaasumik inuit ikiartoqquneqarneranni taaguutigineqarpoq.



Kangerlussuulli Mittarfiani allagartaliusseq ima allassimalluni
"Isumannaallisaavik".


Oqaasiliortut isumaqatigiillutik aallajangerpaat *security-check*
isumannaarsaavik-mik taaguuserneqassasoq, tassani inuit ilaasussat
ulorianartorsiortitsisinnaanerannut isumannarunnaarlugit
misissorneqartarmata.

- 7 pillugu -

SG.: Jakob Schultz allaffigineqassaaq oqaluttuunneqarlunilu 1999-imi
maalaarneq pillugu Oqaasiliortut qanoq aalajangiisimanerannik
ilisimatitsissummik. Ilanngullugu erseqqissaavigineqassaaq *maalaartarfik*
tassaammat aalajangiiffigisassanik suliaqarfik *naammagittaalliorneq*-lli
kimilluunniit sumiluunniit qaqugukkulluunniit inuit akunneranni
atorneqartartoq. Oqaatsit taakku pillugit taamanikkut ataatsimiinnermit
imaqarniliami tunngavilersuutaasut takuneqarsinnaapput.

- 8 pillugu -

CCO.: KIIP-imit Gitte Hertling Inatsisartut peqqussutaanni, normu 2-mi, maajip
31-ianni 2001-imeersumi, paragrafip siulliup immikkoortuata aappaanni, normu
1-ip kalaallisut allassimanera erseqqinngimmat saaffiginnissutigisimavaa.
Taanna tunngavigalugu CCO siunnersuusiorpoq "*qinnuteqartut*
ilinniarnertuunngorniarfimmi atuarsimanissaat imaluunniit ilinniakkamik tassunga
assingusumik ilinniarsimanissaat"-tut allassimanera imatut iluarsineqassasoq:
"qinnuteqartoq ilinniarnertuunngorniarfimmi soraarummeerummik
tassungaluunniit naapertuuttumik naammassinnissimassasoq".
Siunnersuut Oqaasiliortunit tamanit taparserneqarpoq.



- 9 pillugu -

KB.: Oqaatsinut politikkeqalernissamut inassusiaq Inatsisartunit oqaluuserineqalerpat ilimanarluinnarpoq Oqaasiliortut kukkunersiuisutut aasiit paasineqarnissaat.

CCO.: Pilersaarutaavoq inassusiaq saqqummiunneqareerpat kultureqarnermut ilinniartitaanermullu ataatsimiititaliaq aggersarneqassasoq. Tamanna qaqugu pissanersoq sapaatip akunnerata tulliata ingerlanerani paasinarsissaaq.

SG.: Assigiinngitsorpassuit akulerunneqalernissaat pinaveersimatinniarylugit pissusissamisoorsora Inatsisartunut saqqummiunneqarnissaa sioqqullugu ataatsimiititaliap Oqaasiliortunit ataatsimeeqatigineqarnissaa.

AS.: Oqaasileriffik, Oqaasiliortut aammalu oqaatsinut politikkeqalernissamut suleqatigiissitat suliaasa assigiinngissutaat erseqqissarlugit immikkoortinneqarnissaat pingaaruteqarluinnarpoq.

CCO.: Immikkoortukkuutaat assigiinngissuteqaraluartut arlaatigut imminnut kalluarneqartuartarmata siulittaasutut pingaartippaa Oqaasiliortunut killiffiit assigiinngitsut ilisimatitsissutigiuarnissaat.

Carl Chr. Olsen
Siulittaasoq

Kristine Olsvig
Allatsi